

•sawcuenh•

Boux Ciengxrwi

□ Yiz Ciz / 余 执

Cinz Youh ciengx miz song cien lai rongz rwi, ngoenzneix aeu dawz rwi buen daengz Runghgaeugat bae cuengq.

Haetromh, Cinz Youh caeuxcaeux couh hwnqdaej, de youq gyang rongz rwi cienq bae cienq dauq, yawjraen gij rwi neix, de sim' angq youh miz di you. Angq dwg, de ciengx rwi geijcib bi lo, baezneix ciengx ndaej cei q lai, cai q gvaq ndwen lai dem couh ndaej sou dangzrwi lo; you dwg, baenzlai dangzrwi, gai haeuj gyawz bae, de caen mbouj rox.

Ciengx rwi mbouj ndaej cungj youq giz ndeu cuengq, aeu ndwen lai roxnaeuz cibgeij ngoenz couh vuenh dieg cuengq, baenzneix couh yied cuengq liz mbanj yied gyae. Cinz Youh mbouj miz ngaenz cawx ci, doenghbaez buen rwi bae cuengq cungj aeu ra ci daej rag.

Ngoenzneix boux daej bang de rag rwi dwg dahsau ndeu, dahsau neix dwg vunz ndaw singz, byoem ndaem noh hau, ndang reux aek hung, boux raen boux gyaenz. De gaenq daej bang Cinz Youh rag gvaq song baez, mwngz heuh go, gou heuh nuengx, song boux couh sug lo.

Ci hai daengz lo, dahsau saet roengz ci daej, hemq: "Goyouh, gou daengz lubw, cang rwi lo."

"Ei, daej lo." Dingqnyi dahsau hemq, Cinz Youh doq han doq daj ndaw rwibang byaij okdaej.

"Mehloz ha, okdaej cang rwi hwnjci lo." Cinz Youh hemq. Mehloz dwg mehyah Cinz Youh, daeglwg songde heuhguh Daegloz, vunzmbanj couh heuh de guh Mehloz.

Mehloz vunz daemq ndang biz, geij bi neix gaen Cinz Youh okdaej ciengx rwi, mbouj guh geijlai hongnaek, ngoenz beij ngoenz maj vang, ndang de engq luenz lo, Cinz Youh caeuq vunz gangrii seiz ciengz naeuz: "Geij bi neix okdaej ciengx rwi mbouj ndaej maz ngaenz, ciengx ndaej mehyah maj cibgeij gaen noh hix dij ndaej lo."

Cinz Youh lij iq couh maij duzrwi, de bae hagdangz, doengzdaih guhcaemz, de boux ndeu ra duzrwi gangigoj, miz geij baez de deng duzrwi ndat ndaej naj gawh da foeg. De caengz ndaej 10 bi baez raen duzrwi mbin couh rox duzde daj gyawz mbin daej, youh mbin haeuj gyawz bae.

Miz ngoenz ndeu cuengqhaq caeux dauqma, Cinz Youh doiq daxboh naeuz: "Boh, raeuz bae dwk rwi aeu dangzrwi ba?" Cinz Youh couh daiq daxboh hwnj goengq byalaeng bae, youq aen gemh dat he caen miz rongz rwi ndeu, haemhde aeu ndaej 5 gaen lai dangzrwi.

De nanz mbouj nanz ra ndaej rongz rwi ndeu, dangzrwi gwn mbouj liux couh dawz bae haw gai, baengh gai dangzrwi bi daengz haemh ngaenz gyu ngaenz lauz cungj mbouj you gyaq. De mbouj doegsaw le, couh ngoenzngoenz bae ra rwi, mizseiz ngoenz he ra ndaej, mizseiz song sam ngoenz cij ra ndaej.

"Dai lo meh ha, vaiq daej gouq gou ha!" Ngoenz he Cinz Youh cingq youq gyang rungh ra rwi, fwt dingqnyi miz dahsau he heuh gouqmingh, de riengz sing ra daengz dahsau. Dahsau de deng rwi ndat lo, mbouj rox ndat le geijlai cim, gwnz gyaiej gwnz gen gwnz ga cungj deng caez, de noh foeg naj bienq saek liux, dot ndaej heuh gouqmingh mbouj dingz.

Cinz Youh naeuz: "Gaej you, gou bang mwngz ywyw."

Caeuq duzrwi guhcaemz lai bi le, Cinz Youh mboujdan raen duzrwi couh rox rongz de youq gizlawz, raen aen rongzrwi couh rox ndawde miz geijlai dangz, lij rox deng duzrwi ndat le, baenzlawz yw dem.

Cinz Youh daiq dahsau bae gizraemh he



naengh yietnaiq, de bae ra rongzrwi haenx.

Yaep he, de aeu ndaej gaem nonrwi he daej, gij nonrwi neix youq gyang fwngz de duzduz doenghngaungau, dahsau lau ndaej youh heuh meh hwnjdaej.

Cinz Youh naeuz: "Gaej lau, aeu neix daej yw rwi ndat cei q ndei lo, mwngz yaek mbouj sieng baenzneix dot, couh aeu gij non neix daej yw."

Dahsau buenq saenq buenq ngeiz, yaengx iet gen gvaqdaej. Cinz Youh dawz geij duz nonrwi nyaenj dek le youq gwnz gen dahsau baedauq cat song baez, yaep ndeu, giz deng rwi ndat couh mbouj dot lo. Ciepdaj, Cinz Youh laebdaeb youq gwnz naj. gwnz gyaiej dahsau cat, cungj mbouj dot lo.

Dahsau cim coh Cinz Youh, yaek gangj youh mbouj gamj gangj, Cinz Youh raen de song fwngz lij got gagoek supheiq sausau, rox gwnz gumq gwnz goekga de hix deng rwi ndat lo. Cinz Youh naeuz: "Lij miz geij duz nonrwi caengz yungh sat, danghnaeuz mwngz saenq gou, couh duet vaq roengzdaej, gou bang mwngz cat ba."

Dahsau baez dingq, naj nding daengz goekrwz bae, de yawjyawj seiqhenz, yaep he cij yot vaq roengzdaej..... Gvaqlaeng Cinz Youh couh caeuq dahsau neix baenz gvanbaz, dahsau neix couhdwg Mehloz.

Cinz Youh ra rwi okmingz lo, vunz yaek cawx dangzrwi couh daej ra de, de ciengz mbouj miz dangzrwi gaeuq gai hawj vunz. De hwnzngoenz naemj baenzlawz cij lai sou ndaej dangzrwi, mbouj geijnanz de couh naemj okdaej lo. De hwnj bya bae ra rwi, aeu dangzrwi le hix aeu rwimeh dauqma ciengx. Mbouj geijnanz, laeng ranz, naj ranz, dingj ranz de cungj baij rim le gij sieng ciengx rwi.

Vunzmbanj cungj okbae dajgoeng, Cinz Youh gvanbaz laemxsim youq ranz ciengx rwi, souhaej mbouj suenq daih, hoeng saedcej gvaq ndaej lij baenz.

Ngoenz he, geij bouxdaeuz haeuj mbanj daej, gyoengqde naeuz cwngfuj naemj bang Cinz Youh ciengx rwibang, baez ndeu ciengx geij bak geij cien sieng rwi. Cinz Youh miz di doeksaet, de mbouj miz ngaenzbonj ciengx baenzlai rwi, engq mbouj saenq boux ndeu ciengx ndaej baenzlai rwi.

Laxlawz, mbanjranz Cinz Youh dwg diegrungh, bya lai reih noix, 20 lai ranz, couh miz 18 ranz dwg bouxgunz, miz mbouj noix bouxcoz cungj aeu mbouj ndaej yah. Cwngfuj naemj bang gyoengqde vaiqdi baenzfouq, youh ra mbouj raen roen byaij.

Cinz Youh ciengx rwi gienh saeh neix cien daengz ndaw yanghfuj, bouxdaeuz nyinhnaeuz diuz roen neix hab guh, gietdingh heuh gyoengq vunzmbanj lai ciengx rwi. Naemj hawj vunzmbanj

cungj maij ciengx rwi, couh aeu bang Cinz Youh ciengx baenz le hawj vunz lai raen, yienghneix diuz roen ciengx rwi baenzfouq neix cij byaij ndaej swnh.

Ciepdaj, bouxdaeuz daiq Cinz Youh okrog bae yawj vunz baenzlawz ciengx rwibang, lij ok ngaenz hawj de guh bonj. Miz cwngfuj daej bang, de ciengx rwi yied ngoenz yied lai, gai dangzrwi souhaej ndaej di ngaenz le, de couh hwnj geij caengz ranzlaeuz, youh youq ndaw singz cawx dauq ranz bak lai bingzfueng ndeu. Vunzmbanj bouxboux haenh ndei, boux doenghbaez okbae dajgoeng cungj dauqranz haeuj rungh bae ciengx rwi.

Geij baez gonq Cinz Youh ciengx mbouj rim cien sieng rwi, dangzrwi youq bonjdieg cingqngamj gaeuq gai. Seizneix de ciengx le cien lai sieng rwi, gya hwnj gyoengq vunz ndaw mbanj ciengx, miz fanh lai sieng rwi, daengz sou dangzrwi seiz, baenzlai dangzrwi gai bae gyawz? Cinz Youh mbouj ndaej mbouj you.

Buen rwi vuenh dieg bae cuengq aeu sai ngoenz ndeu, cang ci roengz ci aen hong neix mbouj vei guh, ranz ndeu gag buen guh mbouj hau. Doenghbaez buen rwi, gyoengq vunzmbanj ciengx rwi cungj guhdoi doxbang, ngoenzneix Daeggenh, Lungzseiq, Minjgiz cungj daej lo, couh noix Cinz Denhbinh mbouj raen daengz.

Cinz Denhbinh caeuq Cinz Youh dwg gyahoh, bohme de ndang bingh, ndawranz gungzhoj, vunz dwg miz rengz youh baenzmbauq, couhdwg 30 geij bi lo lij caengz aeu ndaej yah. De ciengx rwi geij bi, gai dangzrwi hix canh ndaej di ngaenz, doenghbaez de buen rwi, Cinz Youh mbouj ndaej bae bang hix heuh Mehloz bae, bouxwnq mbouj daej mbouj geizgvaq, de mbouj daej Cinz Youh couh roxnyinh miz di geizgvaq.

Lungzseiq naeuz: "Cinz Denhbinh mbouj daej miz maz geizgvaq, ranz de daej boux he couh ndaej lo, mwngz lij naemj heuh daengx ranz de cungj daej cij habsim ha?"

Cinz Youh naeuz: "Ranz de couh de boux ndeu miz rengz guhhong, ranz de lij miz bouxwnq daej gvaq."

Lungzseiq vix coh dahsau gizgyae haenx naeuz: "Dahsau haici haenx couhdwg dahyoux de, ndwenlaeng couh cingj raeuz gwn laeujvan lo, de daej bang mwngz mbouj suenqsoq ha?"

"A!" Cinz Youh doeksaet ndaej mbouj rox gangj maz. Hix mbouj gvaq de, de song gvanbaz okdaej ciengx rwi le, yaep buen gvaq neix yaep buen gvaq haenx, gij saeh ndaw mbanj noix rox. Cinz Youh gag naemj: Dahsau daej rag rwi geij baez lo, saeklah mbouj gangj gvaq maz vah loengh de.

Runghgaeugat ndoeng laep vacwx lai, rwibang buenq daengz gizneix le, duzduz rwi haeujhaej okok muengz gip va. Ngoenz he haetromh, bouxdaeuz ndaw yangh youh daej lo, gyoengqde cam Cinz Youh baezneix aiq sou ndaej geijlai gaen dangzrwi, Cinz Youh naeuz aiq ndaej fanh lai gaen.

Gyoengq bouxdaeuz naeuz: "Seizneix cwngfuj gaenq caeuq aen gijyez baihrog he lienzhaeh bang sou gai dangzrwi, gaen 80 maenz. Gyoengqde baez ndeu couh yaek aeu 10 fanh gaen, dou lauheiq mbouj gaeuq soq hawj vunz, couh gvaqdaej cam sou yawjyawj."

Sou dangzrwi geij ngoenz haenx, gij ci daej rag dangzrwi aen haeuj aen ok, aeu gij dangzrwi ranz neix le, youh aeu gij dangzrwi ranz haenx. Baezneix Cinz Youh ndaej souhaej 70 geij fanh, dawz ngaenzbonj ok, canh ndaej 30 geij fanh. De doeksaet youh sim' angq, gag gangj gag naeuz: "Aen seiq neix caen ndei ha!"